

Inatsisartut Suleriaasianni § 33 naapertorlugu aalajangiiffigisassatut siunnersuut una saqqummiupparput:

Ulloq 1. Januar 2018-imut qitiusumik kiassaateqarfinnut kissarsuuteqarfinnullu il.il. Namminersorlutik Oqartussanit toqqaannanngitsumik toqqaannartumilluunniit pigineqartunut tamanut piginnittuunerup, akisussaanerup, ingerlatsinerup aserfallatsaaliinerullu il.il. Nukissiorfinni ataatsimut katersorneqarnissaat pillugu Naalakkersuisut peqquneqarnissaannut Inatsisartut aalajangiiffigisassaattut siunnersuut.

(Inatsisartunut ilaasortanit Anders Olsenimit, Vivian Motzfeldtimit, Bendt B. Kristiansenimit Villy Olsvig-imit aamma Mala Høy Kúkomit).

Tungavilersuut

UPA 2016/053-imut atatillugu suliaqarnermi Inatsisartut aalajangiipput Naalakkersuisut nassuiaasiussasut, tassanilu allaaserineqassasoq kiassarnermut immikkut uuttusersuineq qanoq ingerlanneqarsinnaanersoq, maannamummi ataatsimoortumik akiligassiisoqartarmat, allaaserineqassarlu maanna ineqarfinni atuuttuni immikkut uuttusersuinermi teknikikkut unammiligassanut aaqqiissutissat.

Kiisalu nassuiaammi ilaatinneqassaaq nunami qitiusumik kissarsuuteqarfiit kiassaateqarfiillu INI A/S-imit, Namminersorlutik Oqartussat ineqarfiutaasa immikkoortortaanit, Mittarfeqarfinnit il.il. Nukissiorfinnut qaqugu nuunneqarnissaat pillugu piffissalersuinermik.

Sanaartornermut ataatsimiititaliap eqqumiigalugu maluginiarpa, qitiusumik kissarsuuteqarfiit kiassaateqarfiillu qaqugu tunniunneqarnissaat pillugu piffissalersuineq nassuiaammi saqqummiunneqartumi suliarineqarsimangitsoq.

Atortussalli tiguneqartut misissornerinut atatillugu ataatsimiititaliap maluginiarpa, nalunaarusiat tunuliaqutaasut malillugit¹ Namminersorlutik Oqartussat suliffeqarfiinit immikkoortortaniillu piginnittuunerup Nukissiorfinnut tunniunneqarsinnaanera piffissap sivikikannersup ingerlanerani

¹Ilaatigut uani: "Kiassaateqarfinnik ingerlatsilernissamut (tigusinissamut) nalunaarusiamut immikkoortoq" Rambøllimeersoq, decembari 2016-imi ullulerneqarsimasoq, kiisalu tapiliussat tiguneqarsimasut, ullorlu 27. februar 2017 Inatsisartunut ilaasortanut nassiussuunneqarsimasut.

periarfissaasoq. Ingerlatsinerup pitsaanerpaaffissaa anguniarlugu piffissamik atuinissaq aamma naatsorsuutigineqartariaqarpoq. Ingerlatsineq pitsaanerpaanngortinniarneqarmat soorunami Sanaartornermut ataatsimiititaliamut nuannaarutissaavoq, ilanngunneqassaarlu aallaqqaammulli qitiusumik kiassaateqarfiit ataatsimut katersornissaannik pingaartitsinissaq Sanaartornermut ataatsimiititaliap kissaatigisimmagu.

Atortussat misissoqqissaareerlugit taamaalilluni Sanaartornermut ataatsimiititaliaq naliliivoq, piginnittuunerup allangortinnissaanut naalakkersuinikkut pisariaqartumik tapersersuisoqartoq, tunniussinerlu pisinnaasoq ukiup naatsorsuusiorfiusup nutaap aallartinnerani.

Taasissutissatut qulequttami Sanaartornermut ataatsimiititaliamit allanneqarpoq "...qitiusumik kiassaateqarfinnut kissarsuuteqarfinnullu ... toqqaannangitsumik toqqaannartumilluunniit pigineqartunut", tassanilu isumagineqarput kissarsuuteqarfiit Nukissiorfinit toqqaannartumik pigineqartut, kisiannili aamma kissarsuuteqarfiit assersuutigalugu maanakkut ineqarfiit immikkoortortannut, immikkoortortarisimasaannut, illuutitut GTO-mit pigineqarsimasunut, atuarfinnut, Mittarfeqarfinnut, kiisalu INI A/S-imut il.il. atasuusut pineqarlutik. Pingaarnersooq tassaavoq qitiusumik kiassaateqarfiit katersorneqarnissaat, taamaalillunilu annertuumik ingerlatsinermi iluaqutit anguneqarsinnaassallutik.

Pisortanut aningaasatigut allaffissornikkullu sunniutissai

Suliap ingerlannissaanut Nukissiorfiit sulisunik sulisitaqassasut naatsorsuutigisariaqarpoq. Tamatumani aningaasat atorineqartussat Nukissiorfiit nammineerlutik nassaarisinnaasariaqarpai, imaluunniit naalakkersuisoqarfimmit suliqartuusumit atugassiissutinit nassaarineqarsinnaasariaqartut, periarfissaavorli sumiiffinni ataasiakkaani kiassarnermik atuisuningaanniit eqqorneqartunit pissarsiniarnissaq.

Kiisalu tunniussinissaq pisortat suliffeqarfiinut attuumassutilinnut sipaaruteqarfiusinnaassasoq naatsorsuutigineqarpoq. Taamatut sipaaruteqarneq pitsaanerpaaffissamiititsinerlu suliffeqarfinni ataasiakkaani annertusiartussasoq naatsorsuutigineqarpoq.

Kiassaateqarfinnik ataatsimoortitsilernermet akissaajaatit attuumassutillit piffissaq ungasinnerusoq eqqarsaatigalugu taamaalillutik nunatsinni atuisunut imminut akilersinnaanissaat naatsorsuutigineqarpoq, kiisalu innuttaasunut akileraartartunut Nunattalu Aningaasivianut sunniuteqarnaviaratik – iluaqutaaratarsinnaavorli.

Namminersortunut aningaasatigut allaffissornikkullu sunniutissai

Nalunaarusiat saqqummiunneqartut naapertorlugit sipaarutaasinnaasut annertussapput, piffissarlu ungasinnerusq eqqarsaatigalugu kiassarnermut akissaajaatinik annertuumik sipaaruteqarnissamik siunnersuut kinguneqassaaq, kiisalu kiassarnermik pilersuinermi atortuutit atuuttut siunissamilu atorneqartussat pitsaanerusumik atorneqarsinnaassallutik.

Innuttaasunut aningaasatigut allaffissornikkullu sunniutissai

Inoqutigiit arlaqarnerusut kiassarnermut tunngasut akisussaaffillu ataatsimut katersorneqariarpata kiassaateqarfinnut atalersinnaanerit naatsorsuutigineqarpoq, annertusaanissamullu periarfissat pitsaanerulissallutik. Taamaalilluni annikitsukkaamik ingerlatsinermi equngassutit pinngitsoortinneqarsinnaassapput, uatsinnullu atugassarititaasut eqqarsaatigalugit aningaasatigut pitsaanerusumik atugassaqarnissaq naatsorsuutigineqarsinnaalluni. Kiassaateqarfinnit imeq atorlugu kiassaanermut amerlanernik aningaasalersuisoqarpat tamanna aamma avatangiisinut iluaqutaassaaq.

Taaku saniatigut sanaartornermut atatillugu killilimmik suliffinnik amerlanernik pilersitsinissaq naatsorsuutigineqarpoq, kiassarnerlu akikinnerulerpat nunatsinni atuisut aningaasaqarnikkut pitsaanermik atugassaqalissapput.